

四庫全書

史部

欽定四庫全書

明史卷一百七十

大學士張廷玉等奉 敕修

列傳第五十八

于謙

于謙字廷益錢塘人生七歲有僧竒之曰他日救時宰相也舉永樂十九年進士宣德初授御史奏對音吐鴻暢帝為傾聽顧佐為都御史待寮屬甚嚴獨下謙以為

才勝已也扈蹕樂安高煦出降帝命謙口數其罪謙正
詞斬斬聲色震厲高煦伏地戰慄稱萬死帝大悅師還
賞賚與諸大臣等出按江西雪冤囚數百疏奏陝西諸
處官校為民害詔遣御史捕之帝知謙可大任會增設
各部右侍郎為直省巡撫乃手書謙名授吏部超遷兵
部右侍郎巡撫河南山西謙至官輕騎偏厯所部延訪
父老察時事所宜興革即具疏言之一歲凡數上小有
水旱輒上聞宣德六年疏言今河南山西積穀各數百

萬請以每歲三月令府州縣報缺食下戶隨分支給先
穀秫次黍麥次稻俟秋成償官而免其老疾及貧不能
償者州縣吏秩滿當遷預備糧有未足不聽離任仍令
風憲官以時稽察詔行之河南近河處時有衝決謹令
厚築隄障計里置亭亭有長責以督率修繕並令種樹
鑿井榆柳夾路道無渴者大同孤懸塞外按山西者不
及至奏別設御史治之盡奪鎮將私墾田為官屯以資
邊用惠威流行太行伏盜皆避匿在官九年遷左侍郎

食二品俸初三楊在政府雅重謙謙所奏朝上夕報可
皆三楊主持而謙每議事京師空橐以入諸權貴人不
能無望正統六年入朝時太監王振方用事適有御史
姓名類謙者嘗忤振因謙疏薦參政王來孫原貞自代
通政使李錫阿振指劾謙以久不遷怨望擅舉人自代
下法司論死繫獄三月已而振知其誤得釋左遷大理
寺少卿山西河南吏民伏闕上書請留謙者以千數周
晉諸王亦言之乃復命謙巡撫時山東陝西流民就食

河南者二十餘萬謙請發河南懷慶二府積粟以振又奏令布政司年富安集其衆授田給牛種使里老司察之前後在任十九年丁內外艱皆令歸治喪旋起復十三年以兵部左侍郎召明年秋額森大入寇王振挾帝親征謙與尚書鄺埜極諫不聽埜從治兵留謙理部事及駕陷土木京師大震衆莫知所為邸王監國命羣臣議戰守侍講徐理言星象有變當南遷謙厲聲曰言南遷者可斬也京師天下根本一動則大事去矣獨不見

宋南渡事乎王是其言守議乃定時京師勁甲精騎皆陷沒所餘疲卒不及十萬人心震恐上下無固志謙請王檄取兩京河南備操軍山東及南京沿海備倭軍江北及北京諸府運糧軍亟赴京師以次經畫部署人心稍安即遷本部尚書郕王方攝朝廷臣請族誅王振而振黨馬順者輒叱言官於是給事中王竑廷擊順衆隨之朝班大亂衛卒聲洶洶王懼欲起謙排衆直前掖王止且啟王宣諭曰順等罪當死勿論衆乃定謙袍袖為

之盡裂退出左掖門吏部尚書王直執謙手數曰國家
正賴公耳今日雖百王直何能為當是時上下皆倚重
謙謙亦毅然以社稷安危為己任初大臣憂國無主太
子方幼寇且至請皇太后立郕王王驚謝至再謙颺言
曰臣等誠憂國家非為私計王乃受命九月景帝立謙
入對慷慨泣奏曰寇得志要留大駕勢必輕中國長驅
而南請飭諸邊守臣協力防遏京營兵械且盡宜亟分
道募民兵令工部繕器甲遣都督孫鏗衛顏張軌張儀

雷通分兵守九門要地列營郭外都御史楊善給事中
王竑參之徙附郭居民入城通州積糧令官軍自詣關
支以贏米為之直毋棄以資敵文臣如軒輓者宜用為
巡撫武臣如石亨楊洪柳溥者宜用為將帥至軍旅之
事臣身當之不效則治臣罪帝深納之十月敕謙提督
各營軍馬而頗森挾上皇破紫荆關直入窺京師石亨
議斂兵堅壁老之謙不可曰奈何示弱使敵益輕我亟
分遣諸將率師二十二萬列陣九門外都督陶瑾安定

門廣寧伯劉安東直門武進伯朱瑛朝陽門都督劉聚
西直門鎮遠侯顧興祖阜成門都指揮李端正陽門都
督劉得新崇文門都指揮湯節宣武門而謙自與石亨
率副總兵范廣武興陳德勝門外當額森以部事付侍
郎吳寧悉閉諸城門身自督戰下令臨陣將不顧軍先
退者斬其將軍不顧將先退者後隊斬前隊於是將士
知必死皆用命副總兵高禮毛福壽却敵彰義門北禽
其長一人帝喜令謙選精兵屯教場以便調用復命太

監興安李永昌同謙理軍務初額森深入視京城可旦
夕下及見官軍嚴陣待意稍沮叛闕喜寧嗾使邀大臣
迎駕索金帛以萬萬計復邀謙及王直胡濙等出議帝
不許額森氣益沮庚申寇窺德勝門謙令亨設伏空舍
遣數騎誘敵敵以萬騎來薄副總兵范廣發火器伏起
齊擊之額森弟博羅平章茂諾海中礮死寇轉至西直
門都督孫鏜禦之亨亦分兵至寇引退副總兵武興擊
寇彰義門與都督王敬挫其前鋒寇且却而內官數百

騎欲爭功躍馬競前陣亂輿被流矢死寇遂至土城居
見升屋號呼投磚石擊寇譁聲動天王竑及福壽援至
寇乃却相持五日額森邀請既不應戰又不利知終弗
可得志又聞勤王師且至恐斷其歸路遂擁上皇由良
鄉西去謙調諸將追擊至關而還論功加謙少保總督
軍務謙曰四郊多壘卿大夫之恥也敢邀功賞哉固辭
不允乃益兵守真保涿易諸府州請以大臣鎮山西防
寇南侵景泰九年正月總兵朱謙奏敵二萬攻圍萬全

敕范廣充總兵官禦之已而寇退謙請即駐兵居庸寇來則出關剿殺退則就糧京師大同叅將許貴奏迤北有三人至鎮欲朝廷遣使講和謙曰前遣指揮季鐸岳謙往而額森隨入寇繼遣通政王復少卿趙榮不見上皇而還和不足恃明矣況我與彼不共戴天理固不可和萬一和而彼肆無厭之求從之則坐敝不從則生變勢亦不得和貴為介冑臣而恒怯如此何以敵愾法當誅移檄切責自是邊將人人主戰守無敢言和者初額

森多所要挾皆以喜寧為謀主上皇乃給寧至邊密敕擒之謙又計授王偉請誅間者小田兒且因謀用間請釋忠勇伯巴爾台家許以封爵使陰圖之額森始有歸上皇意遣使通款京師稍解嚴謙上言南京重地撫輯須人中原多流民設遇歲荒嘯聚可虞乞敕内外守備及各巡撫加意整飾防患未然召還所遣召募文武官及鎮守中官在內地者於時八月上皇北狩且一年矣額森見中國無釁滋欲乞和使者頻至請歸上皇大臣

王直等議遣使奉迎帝不悅曰朕本不欲登大位當時見推實出卿等謙從容曰天位已定寧復有他顧理當速奉迎耳萬一彼果懷詐我有辭矣帝顧而改容曰從汝從汝先後遣李實楊善往卒奉上皇歸謙力也上皇既歸衛拉特復請朝貢先是貢使不過百人正統十三年至三千餘賞賚不饜遂入寇及是又遣使三千來朝謙請列兵居庸關備不虞京師盛陳兵宴之因言和議難恃條上安邊三策請敕大同宣府永平山海遼東各

路總兵官增修備禦京兵分隸五軍神機三千諸營雖各有總兵不相統一請擇精銳十五萬分十營團操團營之制自此始具兵志中衛拉特入貢每攜故所掠人口至謙必奏酬其使前後贖還數百人初永樂中降人安置近畿甚衆額森入寇多為內應謙謀散遣之因西南用兵每有征行輒選其精騎厚資以往已更遣其妻子內患以息楊洪自獨石入衛八城悉以委寇謙使都督孫安以輕騎出龍門關據之募民屯田且戰且

守八城遂復貴州苗未平何文淵議罷二司專設都司
以大將鎮之謙曰不設二司是棄之也議乃寢謙以上
雖還國恥未雪會額森與托克托布哈構怨請乘間發
兵身往討之以復前仇除邊患帝不許謙之為兵部也
額森勢方張福建鄧茂七浙江葉宗留廣東苗蕭養各
擁衆僭號湖廣貴州廣西猺獞苗獠所至蜂起前後征
調皆謙獨運當軍馬倥傯變在俄頃謙目視指屈口具
章奏悉合機宜僚吏受成相顧駭服號令明審雖勲臣

宿將小不中律卽請旨切責片紙行萬里外靡不惕息
其才畧開敏精神周至一時無與比至性過人憂國忘
身上皇雖歸口不言功東宮旣易命兼宮僚者支二俸
諸臣皆辭謙獨辭至再自奉儉約所居僅蔽風雨帝賜
第西華門辭曰國家多難臣子何敢自安固辭不允乃
取前後所賜璽書袍錠之屬悉加封議歲時一省視而
已帝知謙深所論奏無不從者嘗遣使往真定河間采
野菜直沽造乾魚謙一言卽止用一人必密訪謙謙具

實對無所隱不避嫌怨由是諸不任職者皆怨而用弗如謙者亦往往嫉之比寇初退都御史羅通即奏謙上功簿不實御史顧曜言謙太專請六部大事同內閣奏行謙據祖制折之戶部尚書金濂亦疏爭而言者捃摭不已諸御史以深文彈劾者屢矣賴景帝破衆議用之得以盡所設施謙性故剛遇事有不如意輒拊膺歎曰此一腔熱血竟灑何地視諸選與大臣勲舊貴戚意頗輕之憤者益衆又始終不主和議雖上皇實以是得還

不快也徐理以議南遷為謙所斥至是改名有貞稍稍
進用嘗切齒謙石亨本以失律削職謙請宥而用之總
兵十營畏謙不得逞亦不樂謙德勝之捷亨功不加謙
而得世侯內媿乃疏薦謙子冕詔赴京師辭不允謙言
國家多事臣子義不得顧私恩且亨位大將不聞舉一
幽隱拔一行伍微賤以裨軍國而獨薦臣子於公議得
乎臣於軍功力杜僥倖決不敢以子濫功亨復大恚都
督張軌以征苗失律為謙所劾與內侍曹吉祥等皆素

憾謙景泰八年正月壬午亨與吉祥有貞等既迎上皇復位宣諭朝臣畢即執謙與大學士王文下獄誣謙等與黃玠構邪議更立東宮又與太監王誠舒良張永王勤等謀迎立襄王子亨等主其議嗾言官上之都御史蕭惟禎定讞坐以謀逆處極刑文不勝誣辨之疾謙笑曰亨等意耳辨何益奏上英宗尚猶豫曰于謙實有功有貞進曰不殺于謙此舉為無名帝意遂決丙戌改元天順丁亥謙棄市籍其家家戍邊遂溪教諭吾豫言謙

罪當族譙所薦舉諸文武大臣並應誅部議持之而止
千戶白琦又請榜其罪鏤板示天下一時希旨取寵者
率以謙為口實謙自值額森之變誓不與賊俱生嘗留
宿直廬不還私第素病痰疾作景帝遣興安舒良更番
往視聞其服用過薄詔令上方製賜至醢菜畢備又親
幸萬歲山伐竹取漈以賜或言寵謙太過興安等曰彼
日夜分國憂不問家產即彼去令朝廷何處更得此人
及籍沒家無餘貲獨正室鐫鑰甚固啟視則上賜蟒衣

劄器也死之日陰霾四合天下冤之指揮多喇者本出
曹吉祥部下以酒酹謙死所慟哭吉祥怒扶之明日復
酹奠如故都督同知陳逵感謙忠義收遺骸殯之踰年
歸葬杭州逵六合人故舉將才出李時勉門下者也皇
太后初不知謙死比聞嗟悼累日英宗亦悔之謙既死
而亨黨陳汝言代為兵部尚書未一年敗贓累巨萬帝
召大臣入視愀然曰于謙被遇景泰朝死無餘貲汝言
抑何多也亨俯首不能對俄有邊警帝憂形於色恭順

候吳瑾侍進曰使于謙在當不令寇至此帝為默然是
年有貞為亨所中戍金齒又數年亨亦下獄死吉祥謀
反族誅謙事白成化初冕赦歸上疏訟寃得復官賜祭
誥曰當國家之多難保社稷以無虞惟公道之獨持為
權奸所並嫉在先帝已知其枉而朕心實憐其忠天下
傳誦焉弘治二年用給事中孫需言贈特進光祿大夫
柱國大傳謚肅愍賜祠於其墓曰旌功有司歲時致祭
萬厯中改謚忠肅杭州河南山西皆世奉祀不絕冕字

景瞻廕授副千戶坐戍龍門謙寬既雪并復冕官自陳
不願武職改兵部員外郎居官有幹局累遷至應天府
尹致仕卒無子以族子允忠為後世襲杭州衛副千戶
奉祠吳寧字永清歙人宣德五年進士除兵部主事正
統中再遷職方郎中郕王監國謙薦擢本部右侍郎謙
禦寇城外寧掌部事命赴軍中議方畧比還北城弗啟
寇騎充斥寧立雨中指揮兵士移時乃入寇既退畿民
猶日數驚相率南徙或議仍召勤王兵寧曰是益之使

驚也莫若告捷四方人心自定因具奏行之景泰改元以疾乞歸後不復出家居三十餘年卒寧方介有識鑑嘗為謙擇婿得千戶朱驥謙疑之寧曰公他日當得其力謙被刑驥果歸其喪葬之驥自有傳王偉字士英攸人年十四隨父謫戍宣府宣宗巡邊獻安邊頌命補保安州學生舉正統元年進士改庶吉士授戶部主事英宗北狩命行監察御史事集民壯守廣平謙引為職方司郎中軍書填委處分多中竅會遂薦擢兵部右侍郎

出視邊叛人小田兒為敵間謙屬偉圖之會田兒隨貢
使入至陽和城壯士從道旁突出斷其頭去使者不敢
詰偉喜任智數既為謙所引恐嫉謙者目已為朋附嘗
密奏謙誤冀自解帝以其奏授謙謙叩頭謝帝曰吾自
知卿何謝為謙出偉問上與公何言謙笑曰我有失望
君面規我何至爾邪出奏示之偉大慙沮然竟坐謙黨
罷歸成化三年復官請毀白琦所鏤板踰年告病歸卒
贊曰于謙為巡撫時聲績表著卓然負經世之才及時

遘艱虞繕兵固圍景帝既推心置腹謙亦憂國忘家身繫安危志存忠社厥功偉矣變起奪門禍機猝發徐石之徒出力而擠之死當時莫不稱冤然有貞與亨吉祥相繼得禍皆不旋踵而謙忠心義烈與日月爭光卒得復官賜恤公論久而後定信夫

明史卷一百七十

欽定四庫全書

明史卷一百七十考證

于謙傳出按江西雪冤囚數百

臣章宗瀛按謙按江

西時藩府以和買為市屢害懲治之無所避見獻徵
錄傳未載謹識

于謙傳巡撫河南山西

臣章宗瀛按謙為巡撫在宣

德五年九月維時同被命者尚有周忱趙新趙倫吳
政曹宏五人謙最少甫三十三歲見明實錄謹附考

于謙傳宣德六年疏言今河南山西積穀 臣章宗瀛

按明實錄謙以正統六年三月下獄五月釋為大理
寺少卿未幾復以吏民之請仍出巡撫此處流通河
南山西積穀乃宣德六年事刻本誤作正統依次類
叙轉似下獄在正統六年後與實錄不符正統當係
宣德之訛謹據改

于謙傳正統六年入朝時太監王振方用事適有御史
姓名類謙者嘗忤振因謙疏薦參政王來孫原貞自

代通政使李錫阿振指劾謙以久不遷怨望擅舉人
自代下法司論死繫獄

臣章宗瀛按三楊本傳士

奇以正統九年卒溥以十一年卒非先卒於正統五
年謙之入朝被陷在六年則不得云三楊已前卒也
考傳內前標正統係宣德之誤已為訂改此處應添
正統紀年則下文所云十三年以兵部左侍郎召方
有根謹擬改及是三楊已前卒句作正統六年入朝
而改次行謙入朝三字作因謙疏薦云云叙事較明

於字數亦合謹識

于謙傳額森弟博囉平章茂諾海中礮死 臣章宗瀛

按是役謙先已遣諜探知英宗駐駕地距營遠故以
火礮擊額森營死者數千人見明張珣琬琰錄謹附
識

于謙傳額森多所要挾以喜寧為謀主上皇乃紿寧至
邊密敕擒之謙又計授王偉誘誅間者小田兒 臣

章宗瀛按識大錄大事記載喜寧與袁彬俱從英宗

至北寧乃為額森謀告以中國虛實又因索彬忠勤
說額森誅之英宗乃與彬謀偽告額森以令寧赴邊
索餉而置書寧從人衣中邊將得書遂擒寧是喜寧
之擒實出英宗與謙無預也擬改謙令密二句作上
皇乃紿寧至邊密敕擒之下接謙又計授王偉云云
以訂傳誤刪去前一行講字即符字數謹識

于謙傳會額森與托克托布哈構怨

臣章宗瀛按外

國傳額森姊為托克托布哈妻額森欲立其姊子托

克托布哈不從遂治兵相攻此傳云額森與托克托
布哈構語意未足構字下似脫怨字謹按大義增入
構字下增怨字又托克托布哈校原板多一字擬刪
二行大字四行而字以符勾刻



明史卷一百七十考證

欽定四庫全書

史部

明史卷一百七十二

御史_臣李陽斌覆勘

總校官編修_臣朱鈞

欽定四庫全書

明史卷一百七十一

大學士張廷玉等奉 敕修

列傳第五十九

王驥

徐有真

楊善

王越

王驥字尚德東鹿人長身偉幹便騎射剛毅有膽曉暢

戎畧中永樂四年進士為兵科給事中使山西奏免鹽

池逋課二十餘萬尋遷山西按察司副使洪熙元年入
為順天府尹宣德初擢兵部右侍郎代顧佐署都察院
久之署兵部尚書九年命為真正統元年奉詔議邊事
越五日未奏帝怒執驥與侍郎鄭瑄下獄尋得釋阿勒
台多爾濟巴勒數寇甘涼邊將屢失利侍郎柴車徐晞
御史曹翼相繼經理邊務未能制二年五月乃命驥往
許便宜行事驥馳至軍大會諸將問往時追敵魚兒海
子先退敗軍者誰僉曰都指揮安敬驥先承密旨戮敬

遂縛敬斬轅門并宣敕責都督蔣貴諸將皆股慄驕乃
大閱將士分兵畫地使各自防禦邊境肅然閱軍甘涼
汰三之一定更番法兵得休息而轉輸亦省俄阿勒台
復入寇帝以任禮為平羌將軍蔣貴趙安為副驥督軍
三年春偕諸將出塞以貴為前鋒自與任禮帥大軍後
繼與貴約曰不捷無相見也貴擊敗石城敵走烏拉納
貴帥輕騎二千五百人出鎮夷間道兼行三日夜及之
禽左丞托囉斬首三百餘獲金銀印各一駝馬兵甲千

計驥與禮自梧桐林至額齊訥禽檢密同知僉院十五人萬戶二人降其部落窮追至黑泉而趙安等出昌寧至多喇溝亦禽右丞達魯噶齊三十人分道夾擊轉戰千餘里多爾濟巴勒遠遁論功貴禮皆封伯而驥兼大理卿支二俸尋召還理部事久之麓川役起麓川宣慰使思任發叛數敗王師黔國公沐晟討之不利道卒以沐昂代昂條上攻取策徵兵十二萬人中官王振方用事喜功名以驥可屬思大舉驥亦欲自效六年正月遂

拜將貴平蠻將軍李安劉聚為副而驥總督軍務大發
東南諸道兵十五萬討之刑部侍郎何文淵侍講劉球
先後疏諫不納瀕行賜驥貴金兕牟細鎧蟒繡緋衣朱
弓矢驥請得以便宜從事馳傳至雲南部署諸將遣參
將冉保由東路趨孟定大軍由中路至騰衝分道夾擊
是年十一月與貴以二萬人趨上江圍其寨五日不下
會大風縱火焚柵拔之斬首五萬餘級進自夾衆石渡
下江通高黎貢山道閏月至騰衝長驅抵杉木籠山賊

乘高據險築七壘相救驥遣叅將宮聚副將劉聚分左右翼緣嶺上而自將中軍奮擊之賊大潰乘勝至馬鞍山踰月抵賊巢山陡絕深塹環之東南面江壁立不可上驥遣前軍覘賊敗其伏兵賊更自間道立柵馬鞍山出大軍後驥戒軍中無動而令都指揮方瑛以六千人突賊寨斬首數百復誘敗其衆陳會東路軍冉保等已合水邦車里大候諸土軍破烏木弄戛邦諸寨遣別將守西戎渡防賊軼刻期與大軍會驥乃督諸將環攻其

七門積薪縱火風大作賊焚死無算溺江死者數萬人
思任發攜二子走孟養獲其虎符金牌宣慰司印及所
掠騰衝諸衛所印章三十有奇犁其巢穴留兵守之而
還明年四月遣偏師討維摩土司韋郎羅郎羅走安南
俘其妻子傳檄安南縛之以獻五月師還帝遣戶部侍
郎王質齎羊酒迎勞賜宴奉天門封推誠宣力武臣特
進榮祿大夫上柱國靖遠伯歲祿千二百石世襲指揮
同知賜貂蟬冠玉帶貴進侯劉聚等遷賞有差從征少

卿李黃郎中侯璉楊寧皆擢侍郎士卒賜予加等府庫
為竭思任發之竄緬甸也其子思機發復帥餘衆居者
藍乞入朝謝罪廷議因而撫之王振不可是年八月復
命驥總督雲南軍務帥叅將冉保毛福壽以往未至而
思機發遣弟招寨入貢緬甸亦奏獲思任發要麓川地
朝廷不納其貢且敕驥圖緬甸驥因請濟師八年五月
復命蔣貴為平蠻將軍調土兵五萬往發卒轉餉五十
萬人驥初檄緬甸送思任發緬甸人陽聽命持兩端是年

冬大軍逼緬甸緬人以樓船載思任發覘官軍而潛以
他舟載之歸驥知緬人資木邦水利為唇齒且慮思機
發將以獻其父故仇之故終不肯獻思任發驥乃趨者
藍破思機發巢得其妻子部落而思機發獨脫去明年
召還加祿三百石命與都御史陳鑑巡延綏寧夏甘肅
諸邊初寧夏備邊軍半歲一更後邊事亟三年及更軍
士日久疲罷又益選軍餘防冬家有五六人在邊者軍
用重困驥請歲一更當代者以十月至而代者留至來

年正月乃遣歸邊備足而軍不勞帝善其議行之諸邊當是時緬人已以思任發來獻而思機發竊駐孟養地屢遣使入貢謝罪中外咸願罷兵振意終未慊要思機發躬入朝謝沐斌帥師至金沙江招之不至諭孟養執之以獻亦不聽命於是振怒欲盡滅其種類十三年春復命驥總督軍務宮聚為平蠻將軍帥師十五萬人往明年造舟浮金沙江蠻人柵西岸拒守官軍聯舟為浮橋以濟拔其柵進破鬼哭山連下十餘寨墜溺死者無

笑而思機發終脫去不可得是時官軍踰孟養至孟那
海地在金沙江西去麓川千里自古兵力所不至諸蠻
見大軍皆震怖而大軍遠涉驛慮餽餉不繼亟謀引還
時思機發雖遁匿而思任發少子思陸復擁衆據孟養
驥度賊終不可滅乃與思陸約立石表誓金沙江上曰
石爛江枯爾乃得渡遂班師驥凡三征麓川卒不得思
機發議者咎驥等老師費財以一隅騷動天下而會川
衛訓導詹英抗疏劾之大畧謂驥等多役民夫昇綵繒

散諸土司以邀厚利擅用腐刑詭言進御實充私役師
行無紀十五萬人一日起行互相蹂踐每軍負米六斗
跋涉山谷自縊者多抵金沙江傍徨不敢渡既渡不敢
攻攻而失都指揮路宣翟亨等俟賊解多捕魚戶為俘
以地分木邦緬甸掩敗為功此何異李宓之敗而楊國
忠以捷聞也奏下法司王振左右之得不問而命英從
驥軍自效英知往且獲罪匿不去當是時湖廣貴州諸
苗所在蜂起圍平赴及諸城堡貴州東路閉驥至武昌

詔還軍討苗會英宗北狩羣臣劾王振并及驥以驥方
在軍且倚之平苗置弗問命佩平蠻將軍印充總兵官
侍郎侯璉總督軍務已而苗益熾衆至十餘萬平越被
圍半歲巡按御史黃鎬死守糧盡掘草根食之而驥頓
軍辰沅不進景泰元年鎬草疏置竹筒中募人自間道
出聞於朝更命保定伯梁瑤為平蠻將軍益兵二萬人
侯璉自雲南督之前疾戰大破賊盡解諸城圍而驥亦
俘剽平王蟲富等以獻驥還命總督南京機務其冬乞

世券與之南畿軍素偷惰驥至以所馭軍法教之于謙
弗重也朝廷以其舊臣寵禮之三年四月賜敕解任奉
朝請驥年七十餘躍馬食肉盛聲伎如故久之石亨徐
有貞等奉英宗復辟驥與謀賞稍後上章自訟言臣子
祥入南城為諸將所擠墮地幾死今論功不及疑有蔽
之者帝乃官祥指揮僉事而命驥仍兵部尚書理部事
加號奉天翊衛推誠宣力守正文臣光祿大夫餘如故
數月請老又三年乃卒年八十三贈靖遠侯謚忠毅傳

子瑞及孫添添尚嘉善長公主再傳至孫瑾嘉靖初提督三千營協守南京還掌左府久之佩征蠻將軍印鎮兩廣廣東新寧新興思平間多高山叢箐亡命者輒入諸徭中吏不得問衆至萬餘人流劫高要陽江諸縣官軍討之輒失利二十五年春瑾與巡撫都御史談愷檄諸路土兵誅其魁陳以明悉平諸巢捷聞加太子太保而扶藜葵梅諸山崗馮天恩等據險為寇者亦數十年瑾復督軍分道進勦破巢二百餘復以功廕一子錦衣

百戶言官劾其暴橫召還爵傳至明亡乃絕

徐有貞字元玉初名理吳人宣德八年進士選庶吉士授編修為人短小精悍多智數喜功名凡天官地理兵法水利陰陽方術之書無不諳究時承平既久邊備媿惰而西南用兵不息理以為憂正統七年疏陳兵政五事帝善之而不能用十二年進侍講十四年秋熒惑入南斗理私語友人劉溥曰禍不遠矣亟命妻子南還及土木難作郕王召廷臣問計理大言曰驗之星象稽之

歷數天命已去惟南遷可以紓難太監金英叱之胡濙
陳循咸執不可兵部侍郎于謙曰言南遷者可斬也理
大沮不敢復言景帝即位遣科道官十五人募兵於外
理行監察御史事往彰德寇退召還仍故官理急於進
取自朔南遷議為內廷訕笑久不得遷因遺陳循玉帶
且用星術言公帶將王矣無何循果加少保大喜因屢
薦之而是時用人多決於少保于謙理屬謙門下士遊
說求國子祭酒謙為言於帝帝曰此議南遷徐理邪為

人傾危將壞諸生心術理不知謙之薦之也以為沮已
深怨謙循勸理改名因名有真景泰三年遷右諭德河
決沙灣七載前後治者皆無功廷臣共舉有真乃擢左
僉都御史治之至張秋相度水勢條上三策一置水門
一開支河一濬運河議既定督漕都御史王竑以漕渠
淤淺滯運艘請急塞決口帝敕有真如竑議有真守便
宜言臨清河淺舊矣非因決口未塞也漕臣但知塞決
口為急不知秋冬雖塞來春必復決徒勞無益臣不敢

邀近功詔從其言有貞於是大集民夫躬親督率治渠
建閘起張秋以接河沁河流之旁出不順者為九堰障
之更築大堰捷以水門閱五百五日而工成名具
渠曰廣濟閘曰通源方工之未成也帝以轉漕為急工
部尚書江淵等請遣中書偕文武大臣督京軍五萬人
往助役期三月畢工有貞言京軍一出日費不貲遇漲
則束手坐視無所施力今泄口已合決堤已堅但用沿
河民夫自足集事議遂寢事竣召還佐院事帝厚勞之

復出巡視漕河濟寧十三州縣河夫多負官馬及他雜
辦所司趣之亟有貞為言免之七年秋山東大水河堤
多壞惟有貞所築如故有貞乃修舊隄決口自臨清抵
濟寧各置減水閘水患悉平還朝帝召見獎勞有加進
左副都御史八年正月景帝不豫石亨張軌等謀迎上
皇以告太常卿許彬彬曰此不世功也彬老矣無能為
徐元玉善竒策盍與圖之亨即夜至有貞家聞之大喜
曰須令南城知此意軌曰陰達之矣令太監曹吉祥入

白太后辛巳夜諸人復會有貞所有貞升屋覽乾象丞
下曰時至矣勿失時方有邊敝有貞令軌詭言備非常
勒兵入大內亨掌門鑰夜四鼓開長安門納之既入得
閉以過外兵時天色晦冥亨軌皆惶惑謂有貞曰事當
濟否有貞大言必濟趣之行既薄南城門鎗毀牆以入
上皇燈下獨出問故有貞等俯伏請登位乃呼進舉兵
士惶懼不能舉有貞率諸人助挽以行星月忽開朗上
皇各問諸人姓名至東華門門者拒弗內上皇曰朕太

上皇帝也遂反走乃升奉天門有貞等常服謁賀呼萬
歲景帝明當視朝羣臣咸待漏闕下忽聞殿中呼噪聲
方驚愕俄諸門畢啟有貞出號於衆曰太上皇帝復位
矣趣入賀即日命有貞兼學士入內閣叅預機務明日
加兵部尚書有貞謂亨曰願得冠側注從兄後亨為言
於帝封武功伯兼華蓋殿大學士掌文淵閣事賜號奉
天翊衛推誠宣力守正文臣祿千一百石世錦衣指揮
使給誥券有貞遂誣少保于謙大學士王文毅之內閣

諸臣斥逐畧盡陳循素有德於有貞亦弗救也事權盡歸有貞中外咸側目而有貞愈益發舒進見無時帝亦傾心委任有貞既得志則思自異於曹石窺帝於二人不能無厭色乃稍稍裁之且微言其貪橫狀帝亦為之動御史楊瑄奏劾亨吉祥侵占民田帝問有貞及李賢皆對如瑄奏有詔獎瑄亨吉祥大怨恨日夜謀搆有貞帝方眷有貞時屏人密語吉祥令小豎竊聽得之故洩之帝帝驚問曰安所受此語對曰受之有貞某日語某

事外間無弗聞帝自是疏有貞會御史張鵬等欲糾亨
他罪未上而給事中王鉉泄之亨吉祥二人乃泣訴於
帝謂內閣實主之遂下諸御史獄併逮繫有貞及李賢
忽雷電交作大風折木帝感悟重違亨意乃釋有貞出
為廣東叅政亨等憾未已必欲殺之令人投匿名書指
斥乘輿云有貞怨望使其客馬士權者為之遂追執有
貞於德州并士權下詔獄榜治無驗會承天門災肆赦
亨吉祥慮有貞見釋言於帝曰有貞自撰武功伯券舜

云纘禹成功又自擇封邑武功禹受禪為帝武功者曹操始封也有貞志圖非望帝出以示法司刑部侍郎劉廣衡等奏當棄市詔徙金齒為民亨敗帝從容謂李賢王翺曰徐有貞何大罪為石亨輩所陷耳其釋歸田里成化初復冠帶閒住有貞既釋歸猶冀帝復召時時仰觀天象謂將星在吳益自負常以鉄鞭自隨數起舞及聞韓雍征兩廣有功乃擲鞭太息曰孺子亦應天象邪遂放浪山水間十餘年乃卒有貞初出獄時拊士權背

曰子義士也他日一女相託金齒歸士權時往候之絕不及婚事士權辭去終身不言其事人以是薄有貞而重士權

楊善字思敬大興人年十七為諸生成祖起兵預城守有勞授典儀所引禮舍人永樂元年改鴻臚寺序班善偉風儀音吐洪亮工進止每朝謁引進奏時上目屬之累進右寺丞仁宗即位擢本寺卿宣德六年被劾下獄褫冠帶踰月正統六年子容詐作中官書假金於尚書

吳中事覺謫戍威遠衛置善不問久之擢禮部左侍郎
仍視鴻臚事十四年八月扈駕北征及土木師潰善間
行得脫額森將入寇改左副都御史與都督王通提督
京城守備寇退進右都御史視鴻臚如故景泰元年廷
臣朝正畢循故事相賀於朝房善獨流涕曰上皇在何
所而我曹自相賀乎衆媿為之止是年夏李實羅綺使
衛拉特特議罷兵未還而額森使至言朝廷遣使報阿拉
知院而不遣大臣報汗及太師事必不濟尚書王直等

奏其言廷議簡四人為正副使與偕行帝命俟李實還
議之已而實將至及命善及侍郎趙榮為使齎金銀書
幣先往是素敏者請齋服御物問上皇安不納及是尚
書胡濙等言上皇蒙塵久御用服食宜付善等隨行亦
不報時額森欲還上皇而敕書無奉迎語自齋賜額森
外善等無他賜善乃出家財悉市彼中所需者攜以往
既至其館伴與飲帳中詔善曰土木之役六師何怯也
善曰彼時官軍壯者悉南征王司禮邀大駕幸其里不

為戰備故令汝得志耳今南征將士歸可二十萬又募
中外材官技擊可三十萬悉教以神鎗火器藥弩百步
外洞人馬腹立死又用策士言緣邊要害隱鐵椎三尺
馬蹄踐輒穿又刺客林立夜度營幕若猿猴伴色動天
曰惜哉今皆置無用矣問何故曰和議成歡好且若兄
弟安用此因以所齎遣之其人喜悉以語額森明日謁
額森亦大有所遺額森亦喜善因詰之曰太上皇帝朝
太師遣貢使必三千人歲必再賚金幣載途乃背盟見

攻何也額森曰奈何削我馬價予帛多剪裂前後使人往多不歸又減歲賜善曰非削也太師馬歲增價難繼而不忍拒故微損之太師自度價比前孰多也帛剪裂者通事為之事露誅矣即太師貢馬有劣弱貂或敝亦豈太師意耶且使者多至三四千人有為盜或犯他法歸恐得罪故自亡耳留若奚為貢使受宴賜上名或浮其人數朝廷核實而予之所減乃虛數有其人者固不減也額森屢稱善善復曰太師再攻我屠戮數十萬太

師部曲死傷亦不少矣上天好生太師好殺故數有霜
警令還上皇和好如故中國金幣日至兩國俱樂不亦
美乎額森曰敕書何以無奉迎語善曰此欲成太師令
名使自為之若載之敕書是太師迫於朝命非太師誠
心也額森大喜問上皇歸將復得為天子乎善曰天位
已定難再移額森曰堯舜如何善曰堯讓舜今兄讓弟
正相同也其平章昂克問善何不以重寶來購善曰若
齎貨來人謂太師圖利今不爾乃見太師仁義為好男

子垂史策頌揚萬世額森笑稱善知院已延特穆爾勸
額森留使臣而遣使要上皇復位額森懼失信不可竟
許善奉上皇還時舉朝競竒善功而景帝以非初遣旨
薄其賞遷左都御史仍蒞鴻臚事二年廷臣朝正旦畢
修賀朝房善又曰上皇不受賀我曹何相賀也三年正
月加太子太保六年以衰老乞致仕優詔不許善狀貌
魁梧應對捷給然無學術滑稽對客鮮莊語家京師治
第郭外園多善果歲時饋公卿戚里中貴無不得其歡

心王振用事善媚事之至是又與石亨曹吉祥結天順
元年正月亨吉祥奉上皇復辟善以預謀封奉天翊衛
推誠宣力武臣特進光祿大夫柱國興濟伯歲祿千二
百石賜世券掌左軍都督府事尚書胡濙頌善迎駕功
命兼禮部尚書尋改守正文臣善使衛拉持攜四子行
至是並得官又為從子養子乞恩得官者復十數人氣
勢烜赫招權納賄亨輩嫉而間之以是漸疎外二年五
月卒贈興濟侯謚忠敏善負才辨以巧取功名而憐忤

為士論所棄其為序班坐事與庶吉士章樸同繫獄久之相狎時方窮治方孝孺黨樸言有家孝孺集未及燬善從借觀密奏之樸以是誅死而善得復官于謙王文之戮陳循之竄善亦有力焉子宗襲爵後革奪門功降金吾指揮使孫增尚公主李實字孟誠合州人正統七年進士為人恣肆無拘檢有口辨景泰初為禮科給事額森令旺扎勒托歡議和實請行擢禮部右侍郎以往少卿羅綺為副至則見上皇頗得額森要領還言額森

請和無他意及楊善往上皇果還是年十月進右都御史巡撫湖廣五年召還掌院事初實使謁上皇請還京引咎自責失上皇意後以居鄉暴橫斥為民趙榮字孟仁其先西域人元時入中國家閩縣舅薩琦官翰林從入都以能書授中書舍人正統十四年十月額森擁上皇至大同知府霍瑄謁見慟哭而返額森遂犯京師奉上皇登土城邀大臣出迓榮慨然請行大學士高穀拊其背曰子忠義人也解所佩犀帶贈之即擢大理寺少

卿充鴻臚卿偕右通政王復出城朝見進羊酒諸物額森以非大臣遣之還而邀于謙石亨王直胡濙出景帝不遣改榮太常少卿仍供事內閣景泰元年七月擢工部右侍郎偕楊善等往敕書無奉迎語善口辯榮左右之竟奉上皇歸進左侍郎行人王宴請開沁河通漕運再下廷議言不便遣榮往勘還亦言不便尋奉敕會山東河南三司相度河道衆以榮不由科目慢之榮怒多所撻辱又自攝衣探水深淺三司各上章言榮單馬馳

走驚駭軍民杖傷縣官鬻廩米多取其直撫按薛希璉
張琛亦以聞章下治河僉都御史徐有貞覈奏法司言
榮雖失大體終為急于國事鬻米從人所為諸臣侮大
臣抗敕旨宜逮治希璉琛亦宜罪帝令按臣責取諸臣
供狀宥之天順元年進尚書曹欽反榮策馬大呼于市
曰曹賊作逆壯士同我討罪果有至者即率之往賊平
英宗與李賢言歎榮忠命兼大理寺卿食其奉七年以
疾罷成化十一年卒賜恤如制霍瑄字廷璧鳳翔人由

鄉舉入國學授大同通判正統十二年以武進伯朱冕薦就擢知府額森擁英宗至城下瑄與理餉侍郎沈固等出謁叩馬號泣衆露刃叱之不為動上皇命括城內金帛瑄悉所有獻之上皇嘉歎寇數出沒大同渾源甸軍民熬採輒驅掠或幸脫歸率殘傷肢體遺民相率入城無所棲又乏食瑄俱為奏之老弱聽輒徙發粟振而所留城守丁壯除賦役秩滿當遷鎮巡諸臣乞留詔加山西又叅政仍治府事英宗復位徵拜瑄工部右侍郎

而固亦以石亨薦起為戶部尚書既而巡撫上瑄治行
賜誥旌異初瑄在大同巡撫年富被逮瑄資其家還里
為鎮守太監韋力轉所惡撻之十餘至是瑄以聞且言
力轉每宴輒用妓樂服御僭侈如王者強取部民女為
妾力轉亦訐瑄違法事帝兩釋焉其年轉左賜二品服
成化初屢為言官所劾命致仕卒於京師瑄初治郡有
聲晚節不檢特以艱危時見知天子遂久列顯位沈固
丹陽人永樂中起家鄉舉積官至尚書石亨敗乞休去

王越字世昌濬人長身多力善射涉書史有大畧登景泰二年進士廷試日旋風起颺其卷去更給卷乃畢事授御史出按陝西聞父訃不俟代輒歸為都御史所劾帝特原之天順初起掌諸道章奏超拜山東按察使七年大同巡撫都御史韓雍召還帝難其代喟然曰安得如雍者而任之李賢薦越召見越偉服短袂進止便利帝喜擢右副都御史以行甫至遭母憂奪情視事越乃繕器甲簡卒五修堡砦減課勸商為經久計成化三年

撫寧侯朱永征瑪拉噶以越贊理軍務其秋兼巡撫宣
府五年冬寇入河套延綏巡撫王銳請濟師詔越帥師
赴之河套者周朔方秦河南地土沃豐水草東距山西
偏頭關西距寧夏可二千里三面阻河北拊榆林之背
唐三受降城在河外故內地明初阻河為守延綏亦無
事自天順間瑪拉噶等三部始入為寇然時出沒不敢
久駐至是始屯牧其中屢為邊患越至榆林遣遊擊將
軍許寧出西路龍州鎮靖諸堡范景出東路神木鎮羌

諸堡而自與中官秦剛按榆林城為聲援寧戰黎家澗
瑾戰崖窰川皆拔右叅將神英又破敵于鎮羌寇乃退
明年正月以捷聞越引還抵偏頭關延綏告警兵部劾
越擅還詔弗罪而令越屯延綏近地為援寇萬餘騎五
路入掠越令寧等擊退之進右副都御史是年三月朝
廷以阿勒楚爾等擾邊不止拜撫寧侯朱永為將軍與
越共圖之破敵開荒川追奔至牛家寨阿勒楚爾中流
矢走論功進右都御史又明年越以方西征辭大同巡

撫詔聽之加總督軍務專辦西事然是時寇數萬而官軍堪戰者僅萬人又分散防守勢不敵永越乃條上戰守二策尚書白圭亦難之請敕諸將守其年寇復連入懷遠諸堡永越禦却之圭復請大舉搜套明年遣侍郎葉盛至軍議時永已召還越以士卒衣裝盡壞馬死過半請且休兵與盛偕還而廷議以套不滅三邊終無寧歲先所調諸軍已踰八萬將權不一迄無成功宜專遣大將調度乃拜武靖伯趙輔為平虜將軍敕陝西寧夏

延綏三鎮兵皆受節制越總督軍務比至寇方深入環
慶固原飽掠軍竟無功越輔以們都埒博囉呼伽嘉
色凌方強盛勢未可破乃奏言欲窮搜河套非調精兵
十五萬不可今餽餉煩勞公私困竭重加科斂內釁可
虞宜姑事退守散遣士馬量留精銳就糧廊延沿邊軍
民悉令內徙其寇所出沒之所多置烽燧鑿塹築牆以
為保障奏上廷議不決越等又奏寇知我軍大集移營
近河潛謀北渡殆不戰自屈但山陝荒旱芻糧缺供邊

地早寒凍餒相繼以時度之攻取實難請從防守之策
臣等亦暫還朝於是部科諸臣劾越輔欺謾會輔有疾
召還以寧晉伯劉聚代明年越與聚敗寇漫天嶺進左
都御史是時三遣大將皆以越總督軍務寇每入小擊輒
去軍罷即復來率一歲數入將士益玩寇而寇勢轉熾
其年九月們都埒及博囉呼伽嘉色凌留妻子老弱
於紅鹽池大舉深入直抵泰州安定諸州縣越策寇盡
銳西不備東偏乃率延綏總兵官許寧遊擊將軍周玉

各將五千騎為左右哨出榆林踰紅兒山涉白鹽灘兩
晝夜行八百里將至暴風起塵翳目一老卒前曰天贊
我也去而風使敵不覺還軍遇歸寇處下風乘風擊之
蔑不勝矣越遽下馬拜之擢為千戶分兵千為十覆而
身率寧玉張兩翼薄其營大破之禽斬三百五十獲駝
馬器械無算焚其廬帳而還及們埒都等飽掠歸則妻
子畜產已蕩盡相顧痛哭自是遠徙北去不敢復居河
套西陲息肩者數年初文臣視師者率從大軍後出號

令行賞罰而已越始多選跳盪士為腹心將親與冠搏又以間覘敵累重邀刳之或剪其零騎用是數有功十年春廷議設總制府于固原舉定西侯蔣琬為總兵官越提督軍務控制延綏寧夏甘肅三邊總兵巡撫而下並聽節制詔罷琬即以越任之三邊設總制自此始論功加太子少保增俸一級紀功郎中張謹兵科給事中郭鏜等論劉聚等濫殺冒功並劾越妄奏越方自以功大賞薄遂怏怏稱疾還朝明年與左都御史李賓同掌院

事兼督十二團營越素以才自喜不修小節為朝議所
齟至是乃破名檢與羣小關通奸人韋英者以官奴從
征延綏冒功得百戶汪直掌西廠用事英為爪牙越因
英自結于直內閣論罷西廠越遇大學士劉吉劉珝於
朝顯謂之曰汪直行事亦甚公如黃賜專權納賂非直
不能去商萬在事久是非多有所忌憚二公入閣幾日
何亦為此珝曰吾輩所言非為身謀使直行事皆公朝
廷置公卿大夫何為越不能對兵部尚書項忠罷越當

遷而朝命予陝西巡撫余子俊越彌不平請解營務優
詔不許因自陳搢巢功為故尚書白圭所抑從征將士
多未錄乞移所加官酬之子俊亦言越賞不酬功乃進
兵部尚書仍掌院事尋加太子太保越急功名汪直初
東征越望督師為陳鉞所沮鉞驟寵心益豔之十六年
春延綏守臣奏寇潛渡河入靖虜越乃說直出師詔拜
保國公朱永為平虜將軍直監軍而越提督軍務越說
直令永率大軍由南路已與直將輕騎循塞垣而西俱

會榆林越至大同聞敵帳在威寧海子則盡選宣大兩鎮兵二萬出孤店潛行至貓兒莊分數道值大風雨雪晦冥進至威寧寇猶不覺掩擊大破之斬首四百三十餘級獲馬駝牛羊六千師不至榆林而還永所出道迂不見敵無功由是封越威寧伯世襲歲祿千二百石越受封不當復領都察院而越不欲就西班牙御史許進等頌其功引王驥楊善例請仍領院事提督團營從之明年復與直永帥師出大同適寇入掠追擊至黑石崖禽

斬百二十餘人獲馬七百匹進太子太傅增歲祿四百石明制文臣不得封公侯越從勲臣例改掌前軍都督府總五軍營兵督團營如故自是真為武人且望侯矣其年五月宣府告警命佩平胡將軍印充總兵官復以直監督軍務率京軍萬人赴之比至寇已去因留屯其地至冬而直為其儕所間寵衰越等再請班師不許陳鉞居兵部亦代直為請帝切責之兩人始懼已大同總兵孫鉞卒即命越代之而以直總鎮大同宣府悉召京

營將士還明年寇犯延綏越等調兵援之頗有斬獲益
祿五十石帝是時益知越直交結狀大學士萬安等以
越有智計恐誘直復進乃請調越延綏以離之兩人勢
益衰明年直得罪言官并劾越詔奪爵除名謫居安陸
三子以功廕得官者皆削籍且使使齎敕諭之越聞使
至欲自裁見敕有從輕語乃稍自安越既為禮法士所
疾自負豪傑驕然自如飲食供奉擬王者射獵聲樂自
恣雖謫徙不少衰故其得罪時議頗謂太過而竟無白

之者孝宗立敕還弘治七年越屢疏訟寃詔復左都御史致仕越年七十耄矣復結中官李廣以中旨召掌都察院事給事中李源御史王一言等交章論乃寢十年冬寇犯甘肅廷議復設總制官先後會舉七人不稱旨吏部尚書屠滸以越名上乃詔起原官加太子太保總制甘涼邊務兼巡撫越言甘鎮兵弱非籍延寧兩鎮兵難以克敵請兼制兩鎮解巡撫事從之明年越以寇巢賀蘭山後數擾邊乃分兵三路進勦斬四十三級獲馬

駝百餘加少保兼太子太傅遂條上制置哈密事宜會
李廣得罪死言官連章劾廣黨皆及越越聞憂恨其冬
卒于甘州贈太傅謚襄敏越姿表奇偉議論颯舉久歷
邊陲身經十餘戰知敵情偽及將士勇怯出奇制勝動
有成算獎拔士類籠罩豪俊用財若流水以故人樂為
用又嘗薦楊守隨侶鍾屠滷輩皆有名于世睦族敦舊
振窮卹貧如恐不及其膽智過絕於人嘗與朱永帥千
人巡邊寇卒至永欲走越止之列陣自固寇疑未敢前

薄暮令騎皆下馬銜枚魚貫行自率驍勇為殿從山後
行五十里抵城謂永曰我一動寇追擊無噍類矣示暇
以惑之也下馬行無軍聲令寇不覺耳性故豪縱嘗西
行謁秦王王聞筵奏妓越語王下官為王吠犬久矣寧
無以相酬者因盡乞其妓女以歸一夕大雪方圍爐飲
諸妓擁琵琶侍一小校訕敵還陳敵情未竟越大喜酌
金卮飲之命彈琵琶侑酒即以金卮賜之語畢益喜指
妓絕麗者目之曰若得此何如校皇恐謝越大笑立予

之校所至為盡死力越在時人多咎其貪功及死而將
餒卒情冒功糜餉滋甚邊臣竟未有如越者

贊曰人非有才之難而善用其才之難王驥王越之將
兵楊善之奉使徐有貞之治河其才皆有過人者假使
隨流平進以幹畧自奮不失為名卿大夫而顧以躁於
進取依附攀援雖剖符受封在文臣為希世之遇而譽
望因之隳損甚亦不免削奪名節所繫可不重哉

明史卷一百七十一

欽定四庫全書

明史卷一百七十一考證

王驥傳明年四月遣偏師討維摩土司韋郎羅郎羅走
安南俘其妻子傳檄安南縛之以獻 臣黃壽齡按
是時韋郎羅以維摩州判自稱廣新王故命驥回師
討之見識大錄謹附考

徐有貞傳正統七年疏陳兵政五事帝善之而不能用
臣黃壽齡按軍政五事一每年秋冬遣將巡邊一

於西安八府募兵一命大臣舉邊將一遣大臣練兵
一命天下選舉武勇見明英宗實錄謹附考

徐有貞傳於是大集民夫躬親督率治渠建閘起張秋
以接河沁河流之旁出不順者為九堰障之更築大
堰捷以水門閱五百五十五日而工成名其渠曰廣
濟臣黃壽齡按河渠志有貞治張秋渠成賜名廣
濟傳作廣渠誤謹據改

楊善傳成化初屢為言官所劾命致仕卒於京師臣

黃壽齡按瑄以置其屬司郎中何經為經許其諸不法事雖未加罪因是鬱鬱不樂乞致仕見明陸簡所撰傳史云為言官所劾當指此謹附考

王越傳明年直得罪言官并劾越詔奪爵除名謫居安陸
臣黃壽齡按汪直之謫在成化十九年八月坐其黨貶黜者王越而外尚有戴縉等見明實錄謹附考

明史卷一百七十一考證

欽定四庫全書

明史卷一百七十二

大學士張廷玉等奉 敕修

列傳第六十

羅亨信

侯璉

楊寧

王來

孫原貞

孫需
張憲

朱鑑

楊信民

張驥

竺淵
王晟
耿定
鄧顯

馬謹

程信

白圭

子鉞

張瓚

謝士元

孔鏞

李時敏

鄧廷瓚

王軾

劉丙

羅亨信字用實東莞人永樂二年進士改庶吉士授工科給事中出視浙江水災奏蠲三縣租進吏科右給事中坐累謫交趾為吏居九年仁宗嗣位始召入為御史覈通州倉儲巡按畿內清軍山西皆有聲宣德中有薦

其堪方面者命食按察僉事俸待遷英宗即位之三月擢右僉都御史練兵平涼西寧正統二年蔣貴討阿勒台多爾濟巴勒亨信參軍務至漁兒海貴以芻餉不繼留十日引還亨信讓之曰公等受國恩厚敢臨敵退縮耶死法孰與死敵貴不從亨信上章言貴逗遛狀帝以其章示監督尚書王驥等明年進兵大破之亨信以參贊功進秩一等父喪歸葬還朝改命巡撫宣府大同叅將石亨請簡大同民三之一為軍亨信奏止之十年進

右副都御史巡撫如故時遣官度二鎮軍田一軍八十畝外悉徵稅五升亨信言文皇帝時詔邊軍盡力墾田毋徵稅陛下復申命之今奈何忽為此舉塞上諸軍防邊勞苦無他生業惟事田作每歲自冬徂春迎送衛拉特使臣三月始得就田七月復刈草八月以後修治關塞計一歲中曾無休暇况邊地磽瘠霜早收薄若更徵稅則民不復耕必致寬逸計臣但務積粟不知人心不固雖有粟將誰與守帝納其言而止初亨信嘗奏言額

森專候釁端以圖入寇宜預於直北要害增置城衛為
備不然恐貽大患兵部議寢不行及土木之變人情洶
懼有議棄宣府城者官吏軍民紛然爭出亨信仗劍坐
城下令曰出城者斬又誓諸將為朝廷死守人心始定
額森挾上皇至城南傳命啟門亨信登城語曰奉命守
城不敢擅啟額森逡巡引去赤城鵬鶚懷來永寧保安
諸守將棄城遁並按其罪當是時車駕既北寇騎日薄
城下闕門左右皆戰場守信與總兵楊洪以孤城當其

衡外禦強寇內屏京師洪既入衛又與朱謙共守勞績甚著著兇釐處顛髮盡禿景帝即位進左副都御史明年年七十有四矣乞致仕許之歸八年卒於家

侯璉字廷玉澤州人少慷慨有志節登宣德二年進士授行人烏撒烏蒙土官以爭地相仇殺詔遣璉及同官章聰諭解之正其疆理而還副侍郎章敞使交趾關門卑前驅偃而入璉叱曰此狗竇耳奈何辱天使交人為毀關乃入及歸餽遺無所受遷兵部主事正統初從尚

書柴車等出鐵門關禦阿勒台有功進郎中從王驥征
麓門至金齒驥自統大軍擊思任發遣璉援大侯州賊
衆三萬至督都指揮馬讓盧鉞擊走之遂由高黎貢山
蕙程夜行會大軍壓其巢麓川平拜禮部右侍郎參贊
雲南軍務詔與楊寧二年更代驥再征麓川璉以功遷
左九年代還母憂起復尋調兵部十一年復代寧鎮雲
南思機發竄孟養驥復南征璉與都督張軌分兵進抵
金沙江破之鬼哭山壘書褒賚景泰初貴州苗韋同烈

叛圍新添平越清平興隆諸衛命璉總督貴州軍務討之時副總兵田禮已解新添平越圍璉遂遣兵攻敗都盧水西諸賊貴州道始通又調雲南兵由烏撒會師開畢節諸路檄普安土兵援安南衛而自率師攻紫塘彌勒等十餘寨會賊復圍平越回師擊退之遂分哨七盤坡羊腸河楊老堡解清平圍東至重安江與驤兵會興隆抵鎮遠道皆通捷聞晉兵部尚書進克賞改苗禽其渠王阿同等三十四人別賊阿趙偽稱趙王率衆掠清

平璉復討禽之水西苗阿忽等六族皆自乞歸化詔璉隨方處置景泰元年八月以勞瘁卒於普定年五十三賜祭葬廕其子錦衣衛世襲千戶

楊寧字彥謐歙人宣德五年進士授刑部主事機警多才能時負譽正統初從尚書魏源巡視宣大四年與都督吳亮征麓川賊款軍門約降寧曰兵未加而先降誘我也宜嚴兵待之不聽令寧督運金齒已而賊果大至官兵敗績諸將獲罪寧擢郎中復從王驥至騰衝破賊

寧與太僕少卿李蕢督戰並有功師還寧起拜刑部右侍郎遭母憂奪情九年代侯璉參贊雲南軍務時麓川甫平寧以騰衝地要害與都督沐昂築城置衛設戍兵控諸蠻邊方遂定居二年召還閩浙盜起命寧鎮江西賊至輒擊敗之暇則詢民疾苦境內嚮服景泰初召拜禮部尚書偕胡濙理部事迤北汗遣使入貢寧言宜留使人數日宴勞賜予視額森使倍厚彼性多猜二人必內構邊患可緩帝務誠信不許其冬以足疾調南刑部

七年為御史莊昇所劾遣覈未報寧力詆言官都察院再劾寧脅制言路詔免其罪錄狀示之英宗復辟命致仕踰年卒寧有才而善交權貴嘗自叙前後戰功乞世廕子堦方一歲遂得新安衛副千總

王來字原之慈谿人宣德二年以會試乙榜授新建教諭寧王府以諸生充樂舞來請易以道士諸王府設樂舞生始此六年以薦擢御史出按蘓松常鎮四府命偕巡按周忱考察屬吏敕有請自上裁語來言賊民吏去

之惟恐不逮必請而後行民困多矣帝為改敕賜之中
官陳武以太后命使江南橫甚來數抑之武還懇於帝
帝問都御史顧佐巡按誰也佐以來對帝嘆息稱其賢
曰識之及報命獎諭甚至英宗即位以楊士奇薦擢山
西左參政言流民所在成家及招還故土每以失產復
逃去乞請隨在附籍便又言郡縣官不以農業為務致
民多游惰催徵輒致已命朝廷憫其失業下詔蠲除而
田日荒閒租稅無出累及良民宜擇守長賢者以課農

為職其荒田令附近之家通力合作供租之外聽其均分原主復業則還之蠶桑可裨本業者聽其規畫仍令提學風憲官督之庶人知務本從之來居官廉練達政事侍郎于謙撫山西亟稱其才可置近侍而來執法嚴疾惡尤甚以公事杖死縣令不職者十人逮下獄當徒遇赦以原官調補廣東來自此始折節為和平而政亦修舉正統十三年遷河南左布政使明年改左副都御史巡撫河南及湖廣襄陽諸府額森逼京師來督兵勤

王渡河聞寇退乃引還景泰元年貴州苗叛總督湖廣
貴州軍務侯璉卒於軍進來右都御史代之與保定伯
梁瑄都督毛勝方瑛會兵進討至靖州賊掠長沙寶慶
武岡來等分道邀擊俘斬三千餘人賊遁去已復出掠
官軍連戰皆捷賊魁偉同烈據興隆叔平越清平諸衛
來與方瑛擊敗之賊退保香爐山山陡絕勝瑛與都督
陳友三道進來與瑄大軍繼之先後破三百餘寨會師
香爐山下發礮轟崖石聲動地賊懼縛同烈并賊將五

十八人降餘悉解散遂移軍清平且檄四川兵共勦都
勻草塘諸賊賊望風具牛酒迎降賊平班師詔留來瑄
鎮撫尋命來薰巡撫貴州奏言近因黔楚用兵暫行蠲
爵之例今寇賊稍寧惟平越都勻等四衛之餉宜召商
中鹽罷納米例從之三年十月召還加兼大理寺卿瑄
以來功大乞加旌異都給事中蘇霖駁之乃止來還在
道以貴州苗復反敕回師進討明年事平召為南京工
部尚書英宗復辟六尚書悉罷來歸成化六年卒於家

孫原貞名瑀以字行德興人永樂十三年進士授禮部主事歷郎中英宗初用薦擢河南右參政居官清慎有吏才正統八年大臣會薦遷浙江左布政使久之盜大起閩浙間赦而再叛景帝即位發兵討之原貞嘗策賊必叛上方畧請為備至是即命原貞參議軍事深入禽其魁而溫州餘賊猶未滅命都指揮李信為都督僉事調軍討之遂拜原貞兵部左侍郎參信軍務鎮守浙江丁母憂當去副都御史軒輓請留之報可景泰元年原

貞進兵搗賊巢俘斬首賊陶得二等招撫三千六百餘人追還被掠男女捷聞璽書獎勵請奔喪踰月還鎮復分兵勦平餘寇奏析瑞安地增置泰順析麗水青田二縣地置雲和宣平景平三邑建官置戍盜患遂息論功進秩一等浙官田賦重右布政使楊瓚請均於民田輕額者詔原貞督之田賦以平三年請褒贈禦賊死事武臣指揮同知脫綱王瑛都指揮僉事沈鱗崔源皆得贈卹六月進兵部尚書鎮守如故未幾命考察福建庶官

因留鎮焉福州建寧二府舊有銀冶因寇亂罷朝議復
開原貞執不可乃寢五年冬疏言四方屯軍率以營繕
轉輸諸役妨耕作宜簡精銳實伍餘悉歸之農苟增萬
人屯即歲省支倉糧十二萬石且積餘糧六萬石兵食
豈有不足哉今歲漕數百萬石道路費不貲如浙江糧
軍兌運米石加耗米七斗民自運米石加八斗其餘計
水程遠近加耗是田不加多而賦斂實倍欲民無困不
可得也況今太倉無十數年之積脫遇水旱其何以濟

宜量入為出汰冗食浮費俟倉儲既裕漸減歲漕數而民困可蘓也臣昔官河南稽諸逃民籍凡二十餘萬戶悉轉徙南陽唐鄧襄樊間羣聚謀生安保其不為盜宜及今年豐遣近臣循行督有司籍為編戶給田業課農桑立社學鄉約義倉使敦本務業生計既定徐議賦役庶無他日患時不能盡用後劉千斤之亂果如原貞所料已復鎮浙江英宗復位罷歸成化十年卒年八十七原貞所至有勞績在浙江尤著名孫需字孚吉成化八

年進士為常州府推官疑獄立剖擢南京御史劾僧繼
曉忤旨予杖出為四川副使弘治中累官右副都御史
巡撫河南歲凶募民築汴河堤堤成而饑者亦濟鎮守
中官劉瑯貪橫奸民赴瑯訟者需以法論之遣戍瑯為
跪請執不聽瑯恨次骨大臣子橫于鄉需抑之瑯與謀
改需撫陝西尋改撫鄖陽安輯流民占籍者九萬餘戶
正德元年召為南京兵部右侍郎四年就拜禮部尚書
未兩月劉瑾惡之追論撫河南時事罰米輸邊廷推需

刑部尚書中旨令致仕瑾誅起南京工部尚書就改刑部再改吏部十三年乞休去嘉靖初卒謚清簡張憲字廷式與需同里同舉進士相代為尚書嘗為浙江左布政使後以工部右侍郎督易州山廠公帑無毫髮私厯南京禮部尚書劉瑾勒致仕謹誅起工部卒

朱鑑字用明晉江人童時刲股療父疾舉鄉試授蒲圻教諭宣德二年與廬陵知縣孔文英等四十三人以顧佐薦召於各道觀政三月遂擢御史巡按湖廣諭降梅

花峒賊蕭啓寧等請復舊制同副使僉事按行所部問
民疾苦湖湘俗男女婚嫁多踰三十鑑申明禮制其俗
遂變三載代歸正統五年復按廣東奏設欽州守備都
指揮奉命錄囚多所平反招撫逋叛甚衆還朝請天下
按察司增僉事一人專理屯田遂為定制七年用薦擢
山西左參政奏減平陽採薪供邊夫役景帝監國進布
政使尋擢右副都御史巡撫其地上言額森奸詭百端
殺掠無已復假和親遣使覘伺以送駕為名覲得開闢

延接稍示抗拒彼即有辭其謀既深我慮宜遠宜暫罷
中貴監軍之制假總兵以生殺權使志無所撓計有所
施整散兵募勇士重懸賞格鼓勵義旅徵勤王兵數道
並進戮力復讐庶大駕可還敵兵自退昔者江南寇發
皆以誅王振為名夫事歸朝廷則治歸宦者則亂昔高
皇帝與羣臣議事必屏去左右恐泄事機乞杜權倖之
門凡軍國重事屬任大臣必當有濟景帝嘉納之時衛
拉特窺塞鑑日夜為守禦計景泰元年敵數萬騎攻雁

門都指揮李端擊却之尋犯河曲及義井堡殺二指揮
圍忻代諸州石亨等不能禦長驅抵太原城北山西大
震命鑑移鎮雁門而別遣都督僉事王良鎮太原援兵
漸集敵亦饜乃引去時山西仍遣兵荒鑑外飭戎備內
撫災民勞瘁備至二年十月鎮守山西都御史羅通召
還命鑑兼領其事明年詔遣大臣行天下黜陟有司禮
部侍郎鄒幹至山西多所論劾鑑請召幹還幹因極論
鑑徇護帝是幹言其年十月召鑑佐院事至京致仕去

初景帝易儲鑑貽大學士陳循書言不可且曰陛下於上皇當避位以全大義循大駭英宗復位鑑詣闕上表賀帝曰鑑老疾何妄來其速令還家居二十餘年卒

楊信民名誠以字行浙江新昌人鄉舉入國學宣德時除工科給事中母憂歸營葬土石必躬舁數百步曰吾塋吾母而專役他人吾不安也服闋改刑科正統中清軍江西還奏民隱五事多議行尋以王直薦擢廣東左參議清操絕俗嘗行田野訪利弊為更置性剛負氣按

察使郭智不法信民劾之下獄黃翰代智信民復發其
奸已又劾僉事韋廣廣遂訐信民因與翰俱被逮軍民
譁然詣闕下乞留信民詔復信民官而翰廣鞫寔除名
景帝監國于謙薦之命守備白羊口會廣東賊黃蕭養
圍廣州急嶺南人乞信民乃以為右僉都御史巡撫其
地士民聞而相慶曰楊公來矣時廣東被圍久將士戰
輒敗禁民出入樵採絕而鄉民避賊來者拒不納多為
賊所害民益愁苦歸賊信民至開城門發倉廩刻木鏤

給民得出入賊見木楔曰此楊公所給也不敢傷避賊者悉收保民若更生信民益厲甲兵多方招撫降者日至乃使使持檄入賊營諭以恩信蕭養曰得楊公一言死不恨尅日請見信民單車詣之隔濠與語賊黨望見謹曰果楊公也爭羅拜有泣下者賊以大魚獻信民受之不疑蕭養且降而都督董興大軍至賊忽中變夜有大星隕城外七日而信民暴疾卒時景泰元年三月乙卯也軍民聚哭城中皆縞素賊聞之亦泣曰楊公死吾

屬無歸路矣未幾興平賊所過村聚多殺掠民仰天號
曰楊公在豈使吾曹至是訃聞賜塋祭錄其子玖為國
子生廣東民赴京請建祠許之成化中賜謚恭惠久之
從選人廬從愿請命有司歲以其忌日祭焉

張驥字仲德安化人永樂中舉於鄉入國學宣德初授
御史出按江西慮囚福建有仁廉聲正統八年吏部尚
書王直等應詔博舉廷臣公廉有學行者驥與焉遷大
理右寺丞巡撫山東先是濟南設撫民官專撫流民後

反為民擾驥奏罷之俗遇旱輒伐新塋塚墓殘其肢體
以為旱所由致名曰打旱骨椿以驥言禁絕還朝進右
少卿已命巡視濟寧至淮揚飢民驥立法捕蝗停不急
務蠲逋發廩民賴以濟十三年冬巡撫浙江初慶元人
葉宗留與麗水陳鑑胡濟衆盜福建寶豐諸銀礦已而
羣盜自相殺遂為亂九年七月福建參議竺淵往捕被
執死宗留僭稱王時福建鄧茂七亦聚衆反勢甚張宗
留鑑胡府之流剽浙江江西福建境上參議耿定僉事

王晟及都督僉事陳榮指揮劉真都指揮吳剛龔禮永豐知縣鄧顥前後敗歿遂昌賊蘇牙俞伯通剽蘭溪又與相應遠近震動驤至遣金華知府石瑁擊斬牙等撫定其餘黨而鑑胡方以爭忿殺宗留專其衆自稱大王國號太平建元泰定僞署將帥圍處州分掠武義松楊龍泉永康義烏東陽浦江諸縣未幾茂七死鑑胡勢孤驤命麗水丞丁寧率老人王世昌等齎榜入賊巢招之鑑胡遂偕其黨出降惟陶得二不就撫殺使者入山為

亂如故時十四年四月也驥既招降鑑胡而別賊蘇記
養等掠金華亦為官軍所獲賊勢乃益衰其秋景帝嗣
位召驥還卒於道驥所至咸有建樹山東兩浙民久而
思之鑑胡至京帝宥不誅更遇赦釋免留守衛軍額森
入犯鑑胡乘間亡被逮伏誅竺淵奉化人耿定和州人
王鄆鄆城人鄧顥樂昌人俱進士顥兵潰被執不屈死
詔為營葬淵等贈官錄一子

馬謹字守禮新樂人宣德二年進士事父母孝遭喪親

負土以葬正統中以御史按浙江時修備倭海船徵材于嚴衢諸郡謹恐軍士藉勢肆斬伐請禁飭之報可所至貪猾屏跡疏振台處寧紹四府饑吏部驗封郎中缺人久帝令推擇會謹九載滿尚書郭璉薦謹廉直遂用之十年薦擢湖廣右布政使正統末湖廣叛苗掠靖州命謹同御史侯爵撫諭參將張善率兵繼之謹等至招數千人復業其出掠者擊敗之尋與善破淇溪諸寨景泰初復與善大破臘婆諸洞已同參將李震擊破青龍

渡馬楊山諸賊追奔至雞心嶺先後斬首千四百有奇
師還靖州賊復出掠搗其巢斬獲如前武岡城溪諸賊
結廣西蠻據青肺山復與震攻破之獲賊楊光拳等五
百六十人斬首倍之扶城諸砦聞風欵附謹出入行間
三歲衝冒鋒鏑與諸將同而運籌轉餉功尤多轉左布
政使錄功進秩一等六年五月遷右副都御史仍支二
品俸巡撫河南撫流民三萬一千餘戶天順初廢巡撫
官謹亦罷歸久之卒謹性廉介楊士奇嘗稱為冰霜鐵

石

程信字彥實其先休寧人洪武中戍河間因家焉信舉
正統七年進士授吏科給事中景帝即位薦起薛瑄等
三人額森犯京師信督軍守西城上言五事都督孫鏜
擊額森失利欲入城信不納督軍從城上發箭礮助之
鏜戰益力額森遂却景泰元年請振畿輔饑民復河間
學官生徒因用兵罷遣者皆報可進左給事中以天變
上中興固本十事其言敬天則請帝敦孝友之實以答

天心帝嘉納之明年二月出為山東右參政督餉遼東
巡撫寇深奏盜糧一石以上者死又置新斛視舊加大
屬信鈎考信立碎之曰奈何納人於死深由是不悅信
尋以憂去服闋起四川參政理松潘餉偕侍郎羅綺破
黑虎諸寨天順元年信入賀時方錄景泰間進言者特
擢信太僕卿京衛馬舊多耗信定期征之三營大將石
亨孫鍾曹欽並以奪門有功寵庇諸武臣為言太僕苛
急請改隸兵部信言高皇帝令太僕馬數勿使人知若

隸兵部馬登耗太僕不得聞脫有警馬不給誰任其咎
帝是之乃隸太僕如故明年改左僉都御史巡撫遼東
都指揮夏霖恣不法僉事胡鼎發其四十罪信以聞下
霖錦衣獄門達言信不當代奏帝責令陳狀時寇深方
掌都察院修前卻劾信徵下詔獄降南京太僕少卿五
年詔為刑部右侍郎母憂歸成化元年起兵部尋轉左
四川戎縣山都掌蠻數叛陷合江等九縣廷議發大軍
討之以襄城伯李瑾充總兵官太學劉仁為監督進信

尚書提督軍務至永寧分遣進都督芮成由戎縣巡撫
貴州都御史陳宜參將吳經由芒部都指揮崔旻由普
市冰腦南寧伯毛榮由寧子關巡撫四川都御史汪浩
參將宰用由渡船鋪左右遊擊將軍羅秉忠穆義由金
鵝池而信與瑾居中節制轉戰六日破龍背豹尾諸寨
七百五十餘明年至大壩焚寨千四百五十前後斬首
四千五百有奇俘獲無算按諸九姓不奉化者還瀘州
衛於渡船鋪增至關堡改大壩為太平川長官司分山

都掌地設官建治控制之帝降璽書嘉勞錄功進兼大理寺卿與白圭同涖兵部言官劾信上首功不實信四疏乞休不許信欲有為而阻於圭不自得數稱疾六年春旱應詔言兵事宜更張者四兵弊宜申理者五大畧言延綏兩廣歲遭劫掠宜擇大臣總制四方流民多聚荆襄宜早區畫京軍操練無法功次陞賞未當語多侵圭圭奏寢之改南京兵部參贊機務明年致仕踰年卒贈太子少保謚襄毅信有才力識大體征南蠻時制許

便宜從事迄班師未嘗擅賞戮一人曰刑賞人主大柄
也不得已而假之人幸而事集輒自專非人臣所宜在
南京守備臣欲預錢穀訟獄事信曰守備重臣所以謹
非常也若此乃有司職耳論者躉之子敏政見文苑傳
白圭字宗玉南宮人正統七年進士除御史監朱勇軍
討烏梁海有功巡按山西辨疑獄百餘從車駕北征陷
土木脫還景帝命往澤州募兵尋以陝西按察副使擢
浙江右布政使福建賊鄭懷冒流剽處州協諸將平之

天順二年貴州東苗干把豬等僭號攻劫都勻諸處詔
進右副都御史贊南和侯方瑛軍往討圭以各種諸夷
為東苗羽翼先勦破百四十七砦遂會兵青崖復破四
百七十餘砦乘勝攻六美山干把豬就擒諸苗震讙湖
廣災就命圭巡撫四年召為兵部右侍郎明年保喇寇
莊浪圭與都御史王竑贊都督馮宗軍務分兵巡邊圭
敗之固原州七年進工部尚書成化元年荆襄賊劉千
斤等作亂救撫寧伯朱永為總兵官都督喜信鮑政為

左右參將中官唐慎林貴奉監之而以主提督軍務發
京軍及諸道兵會計千斤名通河南西華人縣門石狻
猊重千斤通隻手舉之因以為號正統中流民聚荆襄
間通竄人為妖言譖謀倡亂石龍者號石和尚聚衆剽
掠通與共起兵偽稱漢王建元德勝流民從者四萬人
主等至南京賊迎戰敗之乘勝逼其巢通奔壽陽謀定
陝西主遣兵扼其道通乃退保大市與苗龍合官軍又
破之雁坪斬通子聰及其黨苗虎等賊退保後崖山據

險下木石如雨諸軍四面攻圭往來督戰士皆蟻附登賊大敗擒通及其衆三千五百餘人獲賊子女萬一千有奇焚其廬舍夷險阻而還石龍與其黨劉長子等逸去轉掠四川連陷巫山大昌圭等分兵蹙之長子縛龍以降餘寇悉平錄功加太子少保增俸一級遭父憂葬畢視事三年改兵部尚書兼督十二團營六年阿勒楚爾等駐牧河套陝西數被寇圭言鎮巡官偷肆宜治延綏巡撫王銳鎮守太監秦剛總兵官房能俱獲罪去圭

乃議大舉搜河套發京兵及他鎮兵十萬屯延綏而以
輸餉責河南山西陝西民不給則預徵明年賦於是內
地騷然而前後所遣三大將朱永趙輔劉聚皆畏怯不
任戰卒以無功十年卒官年五十六贈少傅謚恭敏圭
性簡重公退即閉閣卧請謁皆不得通在貴州時有憤
中官虐而欲刺之者悞入圭所圭擁衾問之其人驚曰
乃吾公耶即自刎不殊仆於地圭呼燭起視傳以善藥
遣之人服其量次子鉞字秉德進士及第授編修累官

太子少保禮部尚書習典故以詞翰稱卒贈太子太保
謚文裕

張瓚字宗器孝感人正統十三年進士授工部主事遷
郎中歷知太原寧波二府有善政成化初市舶中官福
住貪恣瓚禁戢其下住誣瓚於朝瓚遂列住罪住被責
其党多抵法大臣會薦遷廣東參政轉浙江左布政使
十年冬以右副都御史巡撫四川播州致仕宣慰楊輝
言所屬天壩千灣溪諸寨及重安長官司為生苗竊據

請王師進討詔瓚諭還侵地不服則征之瓚率兵討定
請設安寧宣撫司即授輝子友為宣撫以鎮詔可賜敕
獎勞以母老乞歸母已卒會松茂番寇邊詔起復視事
先是僉事林璧言松茂昔為大鎮都御史寇深侍郎羅
綺嘗假便宜專制其地故有功今唯設兩參將以副使
居中調度事權輕臨敵稟令制府千里請戰謀洩機緩
未有能獲利者宜別置重臣彈壓或即命瓚兼領專其
責成十二年七月命瓚兼督松茂安綿建昌軍務瓚至

軍審度形勢改天壩舊設副使於安綿而令副總兵堯
或軍松潘參將孫嵩軍威疊為夾攻計乘間修河西舊
路作浮梁治月城避偏橋棧道軍獲安行輸餉無阻十
四年六月攻白草壩西坡禪定數大砦斬獲亡算徇茂
州疊溪所過降附抵曲山三砦攻破之再討平白草壩
餘寇先後破滅五十二砦賊魁撒哈等皆殲他一百五
砦悉獻馬納款諸番盡平留兵戍要害增置墩堡乃班
師帝嘉其功徵拜戶部左侍郎辭歸終制十五年起左

副都御史總督漕運兼巡撫江北諸府十八年歲大侵
疏請振濟發銀五萬兩復敕瓚移淮安倉糧分振而瓚
已卒瓚功名著西蜀其後撫蜀者如謝士元輩雖有名
不及瓚惟天壩干之役或言楊輝溺愛庶長子友欲官
之詐言生苗為亂瓚信而興師其功不無矯飾云謝士
元字仲仁長樂人景泰五年進士授戶部主事督通州
倉陳四弊屢與監倉宦者忤天順七年擢建昌知府地
多盜為軍將所庇士元以他事持軍將奸發輒得民懷

券訟田宅士元叱曰偽也券今式而所訟乃二十年事
民驚服訟為衰止考滿進從三品俸治府事如故以憂
去服闋起知廣信永豐有銀礦處州民盜發之聚數千
人將士憚其驍獍不敢勦士元勒兵趨之賊遮刺士元
傷左股裏創力戰獲其魁塞礦穴而還入覲改永平遭
喪不赴服闋擢四川右參政進右布政使弘治元年就
擢右副都御史巡撫其地土番大小娃者將煽亂士元
託行邊地詣其地賊恐羅拜道左徐慰遣之歲大役流

民趨就食士元振恤有方全活者數萬明年坐事下獄
事白遂致仕

孔鏞字韶文長洲人景泰五年進士知都昌縣分戶九
等以定役設倉水次便收歛民甚賴之以弟銘尚寧府
郡主改知連山猺獞出沒鄰境縣民悉竄鏞往招之民
驚走鏞炊飯民舍留錢償其民以去民乃漸知親鏞相
率還鏞慰勞振恤俾復故業教以戰守道路漸通縣治
遂復都御史葉盛征廣西以鏞從諸將妄殺者鏞輒力

爭所全活甚衆成化元年用葉盛等薦擢高州試知府
前知府劉海以徭警閉城門自護鄉民避徭至者輒不
納還為徭所戕又疑民陰附賊輒戮之賊緣是激衆怒
為內應城遂陷鎬至開門納來者流亡日歸城不能容
別築城東北居之附郭多暴骸民以疫死復為義塚瘞
焉時賊屯境內者凡十餘部而其魁馮曉屯化州鄧公
長屯茅峒屢招不就鎬一日單騎從二人直抵茅峒峒
去城十里許道遇賊徒令還告曰我新太守也公長驟

聞新守至亟呼其黨擐甲迎及見鏞坦易無駟從氣大
沮鏞徐下馬入坐庭中公長率其徒弛甲羅拜鏞諭曰
汝曹故良民迫凍餒耳前守欲兵汝吾今奉命為汝父
母汝我子也信我則送我歸賚汝粟帛不信則殺我即
大軍至無遺種矣公長猶豫其黨皆感悟泣下鏞曰餒
矣當食我公長為跪上酒饌既食曰日且暮當止宿夜
解衣酣寢賊相顧駭服再宿而返見道旁裸而懸樹上
者累累詢之皆諸生也命盡釋之公長遣數十騎擁還

城中人望見皆大驚謂知府被執來給降也盡登陴鋪
止騎城外獨與羸卒入取穀帛使載歸公長孟感激遂
焚其巢率黨數千人來降公長既降諸賊次第納款惟
曉恃險不服鋪選壯士二百人乘夜抵化州曉倉皇走
匿獲其妻子以歸撫恤甚厚曉亦以五百人降已與僉
事陶魯敗賊廖婆堡他賊先後來犯多敗去境內大定
上官交薦擢按察副使分巡高雷二府益招劇賊梁定
侯大六鄧辛酉等給田產分處內地為官備他盜廣西

賊犯信宜岑溪皆擊敗之治績聞賜誥命旌異遭喪服
除改廣西徭聞錦至悉遠遁十四年兵部上其其功賚
銀幣尋進按察使荔浦賊來寇總督朱英以兵屬錦擊
平之進食二品祿已遷左布政使旋以右副都御史巡
撫貴州清平部苗阿溪者桀驁多智其養子阿賴尤有
力橫行諸部中守臣皆納溪賂驕不可制錦行部至清
平詢得溪所昵者二人遂以計擒溪磔之并討平雞背
苗羣蠻震懾錦居官廉歷仕三十餘年皆在邊陲觸瘴

成疾乞骸骨不許弘治二年召為工部右侍郎道卒年六十三平樂李時敏為信宜知縣嘗與鏞共討平搖亂有功遷知化州粵人以孔李並稱

鄧廷瓚字宗器巴陵人景泰五年進士知淳安縣有惠政丁母憂服降遷太僕寺丞貴州新設程番府地在萬山中蠻獠雜居吏部難其人特擢廷瓚為知府至則悉心規畫城郭衢巷學校壇廟廨舍以次興建榜諭諸獠受約束政平令和巡撫陳儼上其治行帝令久任九載

秩滿始遷山東左參政尋進右布政使弘治二年以右副都御史巡撫貴州廷瓚自令至守淹常調者踰三十年至是去知府止三歲遂得開府以生母憂歸服闋還原任都勻苗七富架長脚等作亂敕廷瓚提督軍務同湖廣總兵官顧溥貴州總兵官王通等討之副使吳倬遣熟苗詐降富架誘令入寇伏兵擒其父子官軍乘勝連破百餘寨生擒長脚以歸羣蠻震懼廷瓚言都勻清平舊設二衛九長官司其人皆世祿自用其法恣虐激

變苗民亂四十餘年今元兇就除非大更張不可請改
為府縣設流官與土官兼治庶可久安因上善後十一
事帝悉從之遂設府一曰都勻州二曰獨山麻哈縣一
曰清平苗患自此漸戢論功進右都御史八年召掌南
京都察院事甫數月命提督兩廣軍務兼巡撫越二年
進左廷瓚治尚簡易於吏事但總大綱結羣蠻以恩信
不輕用兵而兵出必成功鬱林雲壚大桂諸蠻及四會
饑民作亂以次討平兩廣遂無事十三年復召掌南院

未行卒贈太子少保謚襄敏廷瓚有雅量待人不疑時多稱其長者至所設施動中機宜其在貴州平苗功為尤偉云

王軾字用敬公安人天順八年進士授大理右評事遷右寺正錄囚四川平反百餘人擢四川副使歲凶請官銀十萬兩為糴費以按嘉定同知盛崇仁贓罪被訐下吏事白還職改陝西弘治初擢四川按察使三年遷南京右僉都御史提督操江八年進右副都御史總理南

京糧儲旋命巡撫貴州明年入為大理卿詔與刑部裁定條例頒天下十三年拜南京戶部尚書尋命兼左副都御史督貴州軍務討普安賊婦米魯時鎮守中官楊友總兵官曹愷巡撫錢鉞共發兵討魯大敗於阿馬坡都指揮吳遠被執普安幾陷友等請濟師乃以命軾軾未至而友等遣人招賊賊揚言欲降益擁衆攻圍普安安南衛城斷盤江道勢愈熾又乘間劫執友右布政使閻鉦按察使劉福都指揮李宗武郭仁史韜李雄吳達

等死焉軾至以便宜調廣西湖廣雲南四川官軍土兵八萬人合貴州兵分八道進使致仕都督王通將一軍十五年正月參將趙晟破六墜砦賊遁過盤江都指揮張泰等渡江追擊指揮劉懷等遂進解安南衛圍而愷通及都指揮李政亦各破賊砦賊還攻平夷衛及大河扼勒諸堡都御史陳金以雲南兵禦之賊遁歸馬尾籠寨官軍聚攻益急土官鳳英等格殺米魯餘黨遂平用兵凡五月破賊砦千餘斬首四千八百有奇俘獲一千

二百捷聞帝大喜嘉勞召還京賜賚有加錄功加太子少保已改南京兵部參贊機務連乞致仕不允武宗立遇疾復請詔加太子太保賜敕乘傳歸卒贈太保謚襄簡

劉丙字文煥南雄知府實孫也成化末登進士選庶吉士改御史巡按雲南雲南諸司吏舊不得給由父滿子代丙請如例考入官流戍僉發必經兵部多淹延致死丙請屬之撫按土官無後者請錄其弟姪勿令妻妾冒

冠服俱著為例後督兩淮鹽課中官請引二萬為織造費部議許之丙執不可得減四之三歷福建四川副使俱督學校三遷四川左布政使正德六年以右副都御史巡撫湖廣所部鎮溪千戶所箬子坪長官司與貴州銅仁四川酉陽梅桐諸土司犬牙相錯弘治中錯溪苗龍麻陽與銅仁苗龍童保聚衆攻剽土官李椿等實縱之而箬子百夫長龍真與通謀後遂四出劫掠遠近騷然先後守臣莫能制丙將討之賊入連山深箐為拒守

計丙率師破其數寨賊走據天生崖及六龍山貴州巡撫沈林兵繼至連攻破之前後擒童保等二百人斬首八百九十餘級都指揮潘勛又破鎮筵諸寨及麻陽等百六十人斬首級如前餘賊遠遁璽書獎勵丙操履清介敢任事所至嚴明法令修舉遷工部右侍郎採木入山越二載犯風痺得疾卒詔贈尚書謚恭襄

贊曰英景間衛拉特逼西陲邊圉孔棘而黃蕭養葉宗留等劫掠嶺南浙閩境上其後荆襄流民嘯聚則以劉

通石龍為之魁他若都勻松茂黔楚諸苗徭叛者數起
羅亨信侯璉諸人保固封圻誅虜禁亂討則有功撫則
信著宣力封疆無忝厥任矣孔鏞以知府服叛徭其才
力有過人者韓愈言柳中丞行事適機宜風采可畏愛
不如是惡能以有為哉

明史卷一百七十二

欽定四庫全書

明史卷一百七十二考證

羅亨信傳父喪歸葬還朝改命巡撫宣府大同叅將

臣黃壽齡按亨信先已聞父喪因軍務方殷暫留視事及王驥等敗敵黑泉始命馳驛歸塋見明黃佐所撰傳史未詳載謹識

侯璉傳景泰初貴州苗韋同烈叛圍新添平越清平興隆諸衛命璉總督貴州軍務討之時副總兵田禮已

解新添平越圍璉遂遣兵攻敗盧水西諸賊兵

臣

黃壽齡按苗叛始於正統十四年四月維時王驥甫
自雲南班師遂命往討璉與田禮之捷則在景泰元
年五月傳俱以景泰初貫之蓋綜其成功言之也謹
附考

孫原貞傳置雲和宣平景寧三邑

臣

黃壽齡按一統

志雲和宣平景寧三邑皆於景泰二三年分置即原
貞平處州賊後所經理也考之地理志亦同傳誤三

邑作四邑謹據改

楊信民傳尋以王直薦擢廣東左參議清操絕俗嘗行

田野訪利弊為更置

臣黃壽齡按信民官廣東時

民有以公事待詢者所司欲繫諸獄信民曰彼無罪姑遣之去及期自來可也民感其德無不至見明邱濬所撰碑文傳未載謹識

程信傳額森犯京師信督軍守西城上言五事

臣黃

壽齡按信所言五事一曰新號令二曰募勇敢三曰

急勤王四曰設武備五曰養銳氣見明劉珣所撰墓志謹附考

程信民明年改左僉都御史巡撫遼東

臣黃壽齡按

信巡遼時守將董興為曹欽姻家信力裁抑之為之

錄琰錄傳未載謹識

明史卷一百七十二考證